

四庫全書

集部

欽定四庫全書

集部

皇甫司勳集卷一至十二

詳校官監察御史臣曹坦

中書_臣劉源溥覆勘

總校官進士_臣朱鈐

校對官編修_臣沈清藻

謄錄監生_臣林均邦

欽定四庫全書

集部六

皇甫司勳集

別集類五

明

提要

臣等謹案皇甫司勳集六十卷明皇甫汈撰

汈有百泉子緒論已著錄其詩文有政學還

山奉使寓黃家居南都禪栖潭州栢州南中

山居副京來覓司勳北征南署赴京浩歌亭

安雅齋諸集黃虞稷千頃堂書目皆不著錄

晚年手自刪削定為賦一卷詩三十二卷襍
文二十七卷冠以集原一篇其諸集之名仍
分注各卷之末刻於萬曆乙亥范惟一所校
訂也朱彞尊靜志居詩話稱汾集六十卷即
指此本黃虞稷亦不著錄偶未見歟集原自
述其詩始為關洛之音一變為楚音又一變
為江左之音又一變為燕趙之音又一變為
蜀音縷舉其師友淵源甚詳今統觀所作古

體源出三謝近體源出中唐雖乏深湛之思
而雅飭雍容風標自異在明中葉不失為第
二流人馮時可兩航雜錄云皇甫百泉與王
弇州名相埒時人謂百泉如齊魯變可知道
弇州如秦楚強遂稱王王士禎香祖筆記以
時可為確論云乾隆四十六年十二月恭校
上

總纂官臣紀昀臣陸錫熊臣孫士毅

總校官臣陸費墀

欽定四庫全書

皇甫司勳集卷一

明 皇甫汈 撰

賦

禱雪南郊賦

歲屠維赤奮若兮朔易正乎玄英歷固閑於暢月兮練
望幾之翼辰皇帝有事於南郊禱也何禱爾緊鱗運之
迅僚兮氣惜慄而歲甦詭陰伏之莫競兮恒暘若而淹

期金方傷而木沴兮亟春令於僭差薄氷履而易治兮
杲日出其尚熙虞介蟲之為孽兮終旱瘠而癘滋豈嘉
承之弗嗣兮胡元元之逢此罹也先是天子祇被宗伯
崇禋野廬清術司烜絳旻瓊邸閱掌次之則旌門詰羽
林之兵是旦也習霍蒙合爛燦星陳望舒先扶飛廉後
奔張急繕以按招搖之隊振殷麟而走夔魑之神天子
乃離齋宮辭靜室侑方祇款太乙馳道既警乘輿乃出
雲引縣常飈分列戟駟文螭之袵纚兮六素虬之絡繹

翳端路之翠華兮旅中庭以蒼壁樹羽崇牙執紱秉翟
鼉鼓金鏞雞竿玉戚雖九奏之樂未宣而萬舞之侑咸
集少焉清塵起而烟煴於屬車紫熏颺而苾芬乎越席
紛總總其將班兮班戔戔之入覲帷弭環其在宵兮衣
綵縹其斂敬玉佩銷而陸離兮金鋪鬱其晻映天子于
是乎奏芝檢而遵壇屏華蓋之承宸俄改步於靈陛兮
緬稽首乎帝閭肆普淖之充簋兮縮嘉粟之盈罇既而
皇命祝史為我陳詞翹睿圖於憑翼兮庶明徵其鑒之

悅陟降之弗爽兮豈須搖而逝斯禱曰同雲為我興連
氛為我積噫不周其惠來影扶桑其暫暱闕西域啓東
國剪瓊蘂之六霏染瑤壇之一色燔柴焰而霰燼兮醴
酒凝而冰澀拂旋途兮絮為旂擁回鑾兮玉為軾藹藹
浮浮漙漙奕奕普潤中田偃液上陌負白青之袞丈兮
兆豐年於盈尺率土播謠乎兩岐兮踰沙受獻於三脊
斯萬姓洽其懽心而百神歆其明德者也有若酣璇臺
舞瑤室端皮弁曳豹舄將獵之鉏山驚於萍澤則非所

以掩身安形而亦亡裨於昭假焉矣迺有新進小臣叨
扈從覲盛節第嘉頌揚休烈辭曰裡粥粥其帝軫維兮
維匪卹肩恫吾黎兮帝赫延竚神宴娛兮登我百穀戎
叔為兮課功減五三與偕兮菟園者誰負薪咨兮工賡
黃竹帝考祺兮

陽湖草堂賦

王子庭濱於陽湖遂肯堂焉以藏以修乃自謂陽湖子
而人亦曰陽湖先生云嘉靖上章攝提格亥月既望爰

自國子博士拜陪都之祠曹臨觴愴別抽筆而為之賦
其辭曰若夫揚州之大澤吳郡之具區有五湖焉是亦
天下之至水也胥貢注其上善洮滂瀉其玄靈別有一
派滙為陽城表淞潞之神委混崐沫之巨津光涵金鼎
波撼洞庭奔溜則三方灌溉吹澇則百川沸騰漫滅濫
湏漩濶滿泮濂澗疊躍滴湟砰礚涓網澮絡茁襟嶸帶
駭浪雲間驚濤天外爾乃响雷激電沍霧蒸煙洸洸汨
汨汗汗汨汨粲若錦濯淨若練懸蘋藻擾溺芡蓼新鮮

翹莖藻葉翠翳穎潛魚龍出沒鷗鷺聯翩豈返歷陽於
一夕盡底定震澤而偕之千年矣宛中央之美人兮紛
淖約而鑒德敞茗亭之邃構兮宛清沚而嘉客此亦足
以大觀寧必彼馬是適爾乃褰荷裳兮曳蘭佩擢桂楫
兮方松舟既將進而容與復欲去而淹留望洋向以增
歎溯洄從而莫逮于是幽壑斂霏他山吐月采芙蓉雜
杜若喁赤鱗狎玄鶚勗咏嘆以興思悅乘虛而超忽若
石鴈杳冥金牛怪誕孫啼或神徐酣終幻爾若澄江對

謝炎海浮張匪智斯樂亦情相忘若夫釣渭之叟飢泌之士服在王官媚于天子極北九重江南萬里俟濟川以歌說將歸湖而覓蠡

瑞爵軒賦

癸巳亥月之吉曲梁令式燕于堂凡我僚友暨幕屬若而人咸預下陳觴一行有黃雀集於堂隅少則搶榆而起騰躍而上北向雲霄莫知所止邑氓請曰瑞哉瑞哉雀爵之義也黃中之色也君侯握爵中朝殆不遠矣在

昔董仲令不其雀乳聽事前桑民為歌頌吾儕小人敢
效茲為皇甫子讓之再乃題軒之楹曰瑞爵而為之賦
辭曰繫式燕之自公兮實撰吉於茲辰敞初筵之秩秩
兮鵠來止之薰薰被宮商之雅奏兮薦脾臄之雜陳賓
酬主而百拜兮觴引滿於一行乃有黃雀止于華軒若
鼓若舞載翻載翩暫窺檐於下集兮終軼漢而遐騫僉
馳目於罕覲兮倏矯首而去旃嗟伊鳥之弱羽兮繫瑤
光之景星飾元吉以為裳兮錫憑霄之令名於時也仰

無茂樹俯無白糧豈綴綵之汝求兮遂避珠而我翔儼
依人而响响兮儼嘉賓之在堂孰為來哉氓曰君侯之
慶也若夫潘氏徵肩魏生占手性狎陳前聲蜚崔後諒
昭德而匪愆謂報恩乎奚有又若獻自西域集彼東園
出貝多而迅翺望含章而奮翰非鴛非鷺非鶚非鷗同
海燕之呈瑞並谷鶯以遷喬物雖細而表大兮福無門
惟自召紛吾扈此南金兮世方慕夫孔翠展好爵之爾
縻兮願乘軒而列位流清音於以侑兮酤醕顏而既醉

瑕時潛之方翕兮亦利賓其用舉晞上林之寵珍兮巢
桂實而容與傷世網之我嬰兮聊斂翼乎茲處苟一枝
足依兮又焉假夫全樹爾乃揖上客感微禽命芳酌揮
瑤琴爰紀其事以慰我心亂曰園有矰繳鴻則罹兮野
有枳棘鸞則棲兮劇途黯黑鳴梟鵂兮割鮮鼎俎委衆
雛兮鳳翔千仞盍攬輝兮鵬絕雲氣鷃見嗤兮嗟嗟黃
鵠志安知兮相彼鳥矣將鳬飛兮

義鵠賦

余客居陪京嘗養鵠十餘尋被流言將圖歸計乃命童子悉放之一鵠夜去晨來徘徊瞻顧意將戀戀因感而作賦焉詞曰何斯禽之靈哲兮乃戀主而踟躕若含意兮未展猶弔影以相於遶空梁以託宿兮慨故棲之在除方其馴擾晨軒和鳴夕砌飲啄閒暇毛羽鮮麗或命侶以將雛奉清光以娛稚顧以鳥而養鳥胡觀仁而取義逮其主人不樂羣鵠已辭翼將翔而復止聲暫背而仍依豈無匹而守獨舍寥廓而安卑似楚姬之怨別類

田客之相隨痛難驚之騫舞兮俾鸞鳳為之摧頽之冥
鴻之遐舉兮悼鸚鵡之罹灾衆方嫉余之修能兮烏何
意而憐才若夫雀處堂而孔懼兮鵬止舍而賈悲翳鵲
非野鳥兮奚昭隱而示危又若海鷗不驚庭爵斯集愧
未盡乎塵機亦何徵于報德若其張仲之廬乍偃翟公
之門尚開朱生絕謁以謝往敬通却掃而杜來世之喪
道人亦何心昔時結駟今日遺簪請息交於良友恐負
誚於微禽

感別賦

戊申之秋八月初吉季弟水部郎子約以制滿還闕而
余羈紲都亭移書告別發函披誦悲不能勝嗟夫丈夫
之生自懸弧矢以來孰不有志於四方故曰人豈鹿豕
也而可常聚乎此光祿之賦惜其淵雲詞靡而病於兒
女情多蓋別不足以興悲而情有所感於別則悲可知
矣因撰茲賦以代餞云爾辭曰別方異緒離狀殊端在
有情而必款豈同氣而能堪輶車陳於垆側舟楫戒於

江干或感慨於川逝或行嗟乎路難涕臨觴而共收心
執袂而俱酸善哉江生之言曰黯然而銷魂值我愛弟
邁往帝閭愧雙鵠之並舉兮矯乘鴈而孤騫若夫未營
四方聊事一室侍讌庭闈聯經几席辯索研墳遊璣討
厯繹孟氏之有三詠詩人之既翕至其恭承嘉惠忝竊龍
光仲兮叔兮乃以軒而以翥伯也季也復載翱而載翔
或影纓於建禮或結綬於文昌或馳麾於趙魏或沿牒
於楚湘乍垂雲雨少別關山旌指洛而將赴裘滯秦而

未還行行路何極去去情不忍寄芳草於春池攬素毛
於秋省夏暑溽而扇違冬飈厲而衾冷顧吳別而非悲
抑奚悲而云甚迨夫丁辰荼酷軫患纏綿乾覆奄奪慈
景俄殲悼金昆之脆質凋玉樹於華年同朝露之湮盡
展夜壑之已遷繫慶往而弔來亮福倚而禍伏豺狼逞
兇蜂蠆隱毒構曾參為殺人收張儉而屬吏謂死灰其
不然詫凝脂之可畏投清流使合汙惡獨醒而強醉胡
人心之險巇兮亦天道之冥昧賂苟輸而在宥兮囊無

金之可致鄒投珠而遭盼兮和抱璧而蒙冤之文姬以
請駟兮望融弟為急原得與喪其齊塞兮退未遂而觸
藩肆蒼鷹之亂紀兮實桀犬之餘孽隕東晉之玄風兮
點西州之英烈誰百口其相明兮空撫鏡而存舌中郎
奮於鉗徒兮應相起於溺摺尚錄過於代門兮布揚芬
於漢闕將逆施于末路兮終雪恥於前哲斯時也雖具
邇其含悁矧駕言以遠別遵首路之逶遲兮睇蕭晨之
悽緊憑江閣之交疏兮見中洲之帆影淮水落而彭城

荒燕雲飛而冀門近想天上之仙班恍夢中之幻境聚
西笑而心搖托南樓而跡警追二陸於疇昔兮緬兩到
之徂征置美酒以高會兮列祖讌於華楹徵綺羅之妙
舞兮被絲竹以新聲懼堂中之蠟燭忘戶外之驪鳴雖
擬迹而同別亦原悲而異情憤世道之黹黯兮請以余
為殷鑒衆女嫉茲蛾眉兮均自沉於明艷客方誠乎用
光兮嵇弗戢而罹患雲賦就而晚疲賈書上而早譴齒
何貴而象焚軀乃災於豹變庶養德於木雞毋處才以

能鴈辟涉海而獲濟兮諳風波之苦辛傷虎口而幸脫
兮猶心悸而告人疾已瘳而復初兮舉藥石以具陳羽
有落於虛彈兮咎無蹈於震鄰紛余季之玉秀兮又襲
之以蘭芳振逸響於寥漢兮赫揆藻於明光恩被命而
攸渥兮德潤身而彌彰渺岐分于川嶽兮瞥星散於參
商季昔時兮送余余今日兮送子若迭代於天運匪往
復於人事喜何劇而無悲悲何窮而無喜情生文以敘
離詞因情而斂思腸屢絕於停毫泣欲盡而盈紙願行

者其勉旃惋居者之已矣

弔言子祠賦

循故祀以延盼兮儼初地之猶存風蕭蕭而塵黜兮日
慘慘而霧昏但見荒榛蔓草斷礎頽垣狐鼠夕走鳥雀
晨喧並咨嗟於行道每遭迴而過門若夫四禪經始二
梵肇基既流銀以儼殿亦布金而城坻力窮土木之麗
工竭雕鏤之奇疏寮綺綴櫺棋丹施覩莊嚴而恐怖示
寂滅於慈悲由是息心之侶仰止銷迹之衆皈依研經

味品擁錫蒙緇信毗邪之勝境而迦葉之宏規者也詎
知道有隆替業有興亡恒河瀉於金谷祇園表為戟閤
鵠散林遠之舍燕巢王謝之堂寢唄響於鐘磬奏艷曲
於笙簧誰其慨嘆良二千石侵者八九餘者十一乃建
學道之宮爰邃精華之室裡祀言公肅瞻像飾斯文在
茲嘉名允錫絳帳霞披青衿雲集洙泗翔風絃歌振邑
教思無窮胡侯之澤迺有中丞因之開府鈴閣崇威旌
門耀武衛士操戈縣令負弩內有靖柝之廬外設嚴更

之署一旦市兒弄兵博徒構釁崑燎方揚驪灰倏燼遺
簪履於東牆弛扃鑰於北閭民之無良德則不競森栢
將雙樹俱凋甘露與稜霜共盡烏繞枝而倦棲馬號塔
而却引嗟乎經云火宅律曰化城浩劫靡集幻理有徵
胡然而釋胡然而儒胡然而堂胡然而墟法淪於空孽
罹其害測平陂於前因垂傾覆於後誠

皇甫司勳集卷一

欽定四庫全書

皇甫司勳集卷二

明 皇甫汈 撰

四言騷體

相彼古泉

贈吳公也

相彼古泉，湜湜其清。君子吸之，顯允王明。曰既受福，羣小是愠。肅肅嘉征，彌邵彌濬。哉山兩峙，泉侯深矣。懿彼泉源，胡自今矣。之子有懷，嘒其臨矣。

泉之混混睇彼高岡伊誰命之我思隴鄉于以瑩心亦
異之覲于以逮下亦孔之厚茲其方可胡鞠焉疲
民之繹思侯泉浩幽彼其之子莫匪令猷不瑕自天袞

澤方州

相彼古泉六章三章章四句三章章六句

滴彼上善 賦也君子濱於水南遡洄而從者賦

焉

滴彼上善滙厥靈長滔滔其逝在河之陽彼美人兮于

馬遶翔

滴彼上善滙厥連漪滔滔其逝在離之湄彼君子兮于
焉委蛇

滴彼上善二章章六句

歷田歌題張兵憲卷

我所思兮在歷山山閒寂兮水潺湲徂畛學稼慕有鰥
希世謝茲桑者閑龍翔鳳舉鵷鷺班深山鹿豕安可攀
承麾東邁齊魯間側身西望阻蒲關欲往從之虞坂艱

悵隔歲兮草空綠渺佳期兮桂屢丹美人貽我明月環
思公子兮何時還大隱在朝不在野田園何為懷憂摧
心顏

夜泊魯橋胡中丞馳翰至披襟起坐秉燭讀之渢
渢樂章聲中金石口占奉謝

見君晴別君雨人向巫陽去

別君雲作雨思君月出雲疑是湘江上猿啼不可聞

河水瀾瀾獲此雙鯉贈比琅玕報匪瓊玖

夜中不能寐起坐理金聲山月為我明河水為我清思君不見那為情

題施比部四號詩

茗水滙兮雪水長美人容與兮在中央翠竿嫋嫋思得璜藏以巾笥貢明堂烹鮮守鮒兮屯以康功成網弛兮筌盡忘從任公兮憺方羊

右茗雪
漁長

窪尊兮玄鬯玉璫兮黃流羌器用兮各有適行潦之水可以羞美人既醉朱顏柔身後榮名焉足求屈平獨醒

今衆方忌善乎劉生之沉飲兮細萬物以輕世

右寢尊
醉客

峴山高兮茗水深陟窈窕兮眺嶇嶇朝騁駕兮東麓夕

弭節兮西岑啓玉齒兮坐芳林橫鐵笛兮吹龍吟洪濤

震兮玄雲陰參差管籥難為音

右峴山
鐵笛

桂為楫兮蘭為舟揚擢歌兮泛中流滄波興兮碧雲合

佳人不來兮心夷猶溟溟商川待汝濟迢迢天漢從君

遊攬春芳兮屢歇眇秋水兮含愁

右碧浪
蘭舟

春江辭贈諸比部

越鄉兮深處姚江兮攸注將考築於盤渦遂釣於幽
渚春日兮載陽桂楫兮蘭漿泛中流兮容與榜人歌兮
慨慷攬物華之駘蕩鑒水德之靈長朝騁騫兮天姥夕
弭節兮雷門臨禹穴以探秘遡耶溪而討源起渭濱兮
捐吾土濟商川兮排帝閭滄波悵公子芳草憶王孫春
來脉脉江注悠悠河清不可俟胡為久淹留羌銘功於
石室終畢願乎丹丘

蠡爾海氓一首贈中丞平寇也中丞孰謂謂夏公

邦謨也

蠢爾海氓憑險構患聚徒實繁颶起滋蔓法網凝脂因緣反汗伊誰之愆階之為亂亂既不逞歲亦薦饑脫耒為挺裂裳為旗焚廬揭篋沉艍奪輸盤污窟據消泐魁棲鯨氛方煽羽檄來聞皇赫斯怒迺命中丞秉鉞之帥執憲之鄰司疆之彥扞圉之英寵靈是藉嘉謀僉同顯允元老時維夏公建牙賈勇開府臨戎在帷運算對俎折衝肅肅中丞申命有赫革政以仁授師以律厥角先

崩回面內逸一鼓作氣曾不終日於廓青海丹艦宵濟
止必鳴桴動必舉旂天吳効順雲祲斂翳渠醜斯獲脅
從罔治佳兵載戢爰居載寧商無弛市農無輟耕旋凱
奏膚于周之京皇心既懌慶賞攸行桓桓中丞致天之
屈德威溥將神風潛駭共帝波臣易我鱗介化衍遐圻
聲流海外皇眷東顧視民如傷中丞法令皎如秋霜治
絲去勢更絃解張若降時雨若熙春陽鉗徒殊劉甲士
振旅燕樂承休式歌且舞稽首萬年受天之祐小子作

頌嗣美吉甫

送憲使蔡公督晉學政十二解

維揚肇域泰伯始都因江為浸數曰具區列國秦并置
郡首蘇海陵壯麗吟嘏膏腴其劇矣茲邦艱哉惟守漢
簡二千虞稽三九績以政成官由德懋寵以緹輜華以
章綬其桓桓蔡侯產自昀精誕嶽之秀挺國之楨為民
司牧與士作程南參馮翊東寄專城其勸課農桑發摘
姦宄被以仁風臻于化理河內同聲潁川共美匪直望

舒逮及暮已

其四

暫去留思再來快覩絃誦千家菽粟萬

戶爭勞以迎式歌且舞嗟爾羣黎咸侯昔撫

其五

載遷楚

憲俾飭吳戎郵無傳箭幕有懸弓折衝俎上制算帷中

娛枰謝傳緩帶羊公

其六

奚奪之吳邁臻于晉戢武崇文

敘倫興行甫憲斯兼契敷在敬下民疇援天子有命

其七

鍾姚哲吏韋白詞流懷貞陋邵砥節方攸瞠乎後躅邁

種前修恩隆父母令讜君侯

其八

今之士子咸詭於藝或

失則浮或失則靡通闡其微瑄揚其旨侯執厥中務納

於軌

其九

今之使者怙勢作威民不見德惟辟是貽罹以

密網構以厲階公聽惟平和易以綏

其十

遐攬堯墟顧瞻

舜澤迭紹迭興復禹之蹟水遡汾漳山探姑射考俗辨

疆典學之職

其十一

奕奕蔡侯秉粹履醇允文允武惟清

惟寅志舉三代用弼一人鼎鉉鴻烈社稷蓋臣司勲作

頌耀世弗湮

其十二

贈周侍御

東南之美產於會稽竹箭有筠珪璋與齊一解爰挺霜稜

來耀法星洪濤允戢瀚海底寧

解二

辟彼巨川用爾作楫

亦曰砥柱中流是揭

解三

帝閭雖逖宸聽實卑封章朝抗

聖慮夕移

解四

軍旅妨農旱魃為虐民乃薦饑賜租蒙澤

解五殿中簪筆都下埋輪貴戚斂手威懾披鱗

解六

既稱臣

直亦昭主聖元氣以調壽國之命

解七

奉揚天憲出納王

言紀綱攸賴朝廷以尊

解八

文武周君為古柱史五教敬

敷譽髦多士

解九

三吳振德稽首興歌小子作頌刊石弗

磨

解十

皇甫司勳集卷二

欽定四庫全書

皇甫司勳集卷三

明 皇甫汈 撰

五言古詩

議獄詩

敘曰臣汈始第覲政廷尉右署日取古刑書繹之以
究夫君子盡心焉者繹而有所感輒發為詩爰得二
十六篇紀之名曰議獄云

或曰獄可議乎曰可疇克議之曰士師克議之然則作是詩者奈何夫詩非議夫今之獄也議夫古以諷今焉爾君子謂是詩也與政通矣

洪鈞宰玄化大塊敷至仁哲王播粢憲顓蒙葆和真淳風無世下明德有時湮折民紹虞典儆位麗湯刑堯服詎可象姬臬聊具陳斯功匪徒懋休命隆所遵

昊天運休命哲王繹玄理春生有載陽秋殺無停晷大坊嗟久踰湛恩難獨恃豈不戒棼絲奈此回溢水獄吏

苟盈門囿紆遂成市擔撫熾章程奇請繁法比明允願
時忱遏揚躋世美

士師昉自昔建官表惟能周方位司寇秦亦置廷平夏
謨紀大理漢景崇令名正監列羣辟勾檢革咸寧御世
若御勒佐王詰茲民

惟天齊于民含靈在寰宇流矢悲影風忍與金石伍網
密或易罹文深翻見舞凝脂已為疎刺繡末云苦奔馬
匪善馳我索先自腐

天王位正月飭吏布祥刑昭如日星鑒浩若江河行軌
迹既夷易辭驗亦平亭執秩遂為譽僕區終自傾玉條
有三尺金科無十程懸衡乃國法在鼎非吾民

協民本中則折獄尚慈良稽古列嘉師利見休無彊聖
化孚九服帝德光四方頽風距澆季俗吏等尋常衛顙
惜懸命博士奏施行臯陶惟邁德千載揚芬芳

末路速多訟民生滋不辰非屨豈徒象赭衣應勿純誰
謂九人鑿勝彼一人中史遷懋文學鶯拳濟忠欽嗟哉

方下吏司鳴遂無晨潔身寶琬琰慎俾就煨塵

南睢重骨立太甲本思庸孟明豈不念秦穆霸西戎井
田與封建赫赫垂鎬豐唐明失懿矩効此肉刑同安得
緹紫氏千載鼓芳風應有鷄鳴調垂仁漢牘中

從橋犯玉輅入廟竊珍環釋之自守法抗節為平反匪
無尚方劍三尺授奚謦張湯視意旨何啻鸞與鸛矯矯
安陵栢異代同勉旃

嗣君邁陽九艷妻煽方處商辛慘炮烙曠世繩其武丕

丕李唐祚不絕亦如縷火原伊向邇持平藉徐杜區區
麟趾格何以飭斯蠱

酬知儷白壁聽訟得黃金豈不黷爾賄道邇理可謔古
人戒威富象齒能毀身何以讞天子惟有至公心

竒袁效器訟律案日以繁遂逮見知法復啓告密門大
臣不釋滯主者胡守文君子高五聽臚情或見原匪貴
發摘神要使民無冤

設網本為魚冥冥鴻罹之刑以威小人君子亦嬰徽膏

火徒自煎蘭芳有時萎隆隆翻見絕皎皎易成緇蒙莊
戒崇頴願處才不才鄒生下梁獄三嘆攄幽辭

青災願惟恤泣罪矜不讐迨德睽明慎凝科肆虔劉踊
貴屨自賤崇朝聞噢休列星爛若數逸軫惜方適遺亡
及三省孔邇起宗周

古人重向隅何以久坐石安得泰庭中而乃無夜泣若
此秋荼繁畏彼夏日赫三刺不及訊兩造未遑繹宣公
寶明恕相將止刑辟

機辟徇多變畢弋列重圍終朝不及掩誰謂烏無知前方增擊去後已搶掄飛聞幽良殺草懲纖應棄灰我行石阜中下懸千仞谿豈憚行者苦要俾犯者稀

服駕不若驢藝禾在去秔每每原田中無使滋蔓起文情及武赦管仲推其理君恩自照微偏枯非令美大賂重南金願遇陶朱子

偶語蒙極刑妖言著為令殺人如薙草我生謂有命區區鄉校情防川導其性鳶卵無毀傷鳳儀德斯盛

文皇軫民瘼愴念明堂圖遂令五覆奏獄狴有完膚漢
庭致刑措縱囚風不殊後方殘刑逞謂鵲安巢乎

法令惜滋章刑書違啓明崎嶇難自列川險本人情哲
王允欽恤君子利堅貞盜金匪鄰子時亦致山鳴

明條在議故茂典亦原親法行自近始安得庇茲人居
方陪華屋出乃列朱輪朝等磐石固暮為屠戮身鴻恩
本浩蕩觸德甘主臣

寬身本無仁報怨寧有德匹婦襲不忘何況武夫力夫

勿共戴天安肯同中國先王以民成乃謹調人職書之
未可訓推刃豈遑息春秋大九世臥薪甘膽食

大夫刑弗上北面聊寵珍一德豈不麗四維良可敦造
室引自裁徒宮非等論盤水無劔辱朝堂有杖寃死灰
未及炤獄吏從此尊吁嗟洛陽淚漢文猶寡恩

鱗運各有適後天奉玄理表正謹三微求端戒五始物
肅不可羸道成良自此徹縣日勿舉王者本重死昭昭
象魏間安得干其紀

春秋旨數千裁自聖人心善善豈不懷惡惡良獨深欲
蓋罪彌彰辭繁法以森誰當折漢獄淑問宣至今

皇甫司勳集卷三

欽定四庫全書

皇甫司勳集卷四

明 皇甫汈 撰

五言古詩

送楊子祐知興國

尋役謝皇畿，遙征辭帝闕。
朱明垂方隆，脩景迎未歇。
晨旌抗欲徂，午馬嘒不發。
且覆天末觴，暫緩星前轍。
攄情諒子衷，執手信我說。
丕休蒙嘉運，利用賓時哲。
彈冠捐

族閭縹組躋朝列玄士守深湛謁帝生激烈稽首金馬
榮澡身玉壺潔平江波濤興昊穹垢氣結一麾竟出守
三命聊所竊行行邁楚荆泝泝遵吳浙旆指衡服雲帆
掛湘干月遐想百代雄浩嘆一時沒願葆幽谷姿毋俾
蘭芳滅炯介投處言慷慨起長別袂連汗並揮心與飈
俱熱洞庭秋水清擊子中流楫

甘泉先生宴別席上賦三首

天王肇郊儀宗伯不皇暇隆禮樂殷周躋世登虞夏忽

半冬簷規爰返春曹駕進我青衿士坐之絳帳下無譁
啓初筵有與振餘竿豈徒良宴會眷此遠行者奉義各
于邁黷懽亦聊且顧愴留滯身側想寅恭化

愚也蓬樞士少嗜綴文辭柔翰弄綃縠懿矩躡堦簾旁
覽周秦典三復齊梁詩榮華既已隱喫詬竟何施迺慕
夫子學母俾後辰迷授我合一編啓我深湛思循循兩
言誘卓哉百世師呼寐成然覺道腴良在茲

晤言聊一室尋役頓千里緬違梁木仰况謝蓬麻起擊

筑興長謠臨觴熱雙耳匪嗟行路難寔感年華駛樹勲
幸及時息學恐虛此無由慰孔說何以徵孟喜金叢戒
遐心瓊枝葆令美作頌幾永懷敢告同門子

春日書抱柬當道諸君子二首

鱗次歲方獻駘蕩化攸同凍樹荷靈曜潛穎熙朝融乘
木政且平升階澤斯豐奉三超神理吹萬等玄功既漸
八埏外復被九垓中泰來有疇祉時往無再逢牽世詎
嬰網司晨猶在籠效知匪患位處才伴休躬誰謂一羽

弱颺之戾層空懼貽搶榆笑願託扶搖風

璿璣幹迴運寶歷啓東節載陽薄曾暉改陰謝凝結條
風行遐圻飛澤振窮穴昔感百卉腓今覩羣芳悅皇仁
美無遺物化滋未歇恫予秉國楨利賓晞朝列命邑奚
獨愆愬閭良自拙天高赤墀塗雲暗黃金闕區區誰見
知怛怛難具說所藉揚末光終然照孱劣

送袁永之戍越

晨風戒商序竚立野蕭條念茲帝京別軌路脩且遙遙

遙子何之將予情內勞在昔蒙嘉運與子儕王僚媿非
通時哲而俾世網遭人事若浮雲聚散仍一朝子勤越
鄉戍予掌畿輔徭行當慎舟楫平江有波濤吳越古戰
場故鬼日夜號子其感興廢毋用徒忉忉

出京鄭張王三子觴予祠亭作四首

良時不易遇散吏竟難容稽首辭帝闕出自都門東都
門倏萬里雲霧迷九重睠茲同心友結駟遠相從從予
感行邁置酒賢哲宮旭日麗臯薄迴飈振林垆蘭芷猶

未歇施策亦已茸淚為岐路滋志兼物化恫臨流復徒
倚聊以寫情衷

憐君昔抱疴甘此武夷臥寧期時網牽復枉金門步命
駕輕千里傾蓋在一顧並非希世姿遂與驚年暮天道
邈難謀人事艱多迂緬然異得喪已矣各去住聚既同
朝雲散亦等晨霧幸有盈尊酒綢繆抒情愔行予身實
遼願子心相故

謂鄭憲

昔與君交者乃自吳趨見一朝越江潯千里返燕甸謁

帝承明廬伊予蒙嘉薦已傾金籜心復接瓊枝面憂或
枉惠勞樂亦同酣宴投分踰三載恩愛兩無變寧期謝
朝寺重與異鄉縣臨觴心若焚把袂淚如霰努力崇令
德毋謂名可賤

謂張詩

義心輕遠別相送勞密親密親等肉骨倏若商與參置
酒臨河梁飲馬越城闌城闌睇黃屋樓觀香清旻崇高
望弗及疎遠難為陳桑梓懷故墟軒冕絆我身歲月復
行役山川多苦辛凜秋換物色首路愴風塵淚下不可

揮日暮沾人巾

謂王俞

過武城謁言子祠作

溯風枉輕帆戴星理扁櫂起忽之武城有蕩瞻魯道古
邑一何卑令猷久彌劬絃歌謝清響精華契深造曰余
廁文儒耽寂違時好剖符辭帝京腰章宰名趙諒乏操
刀資懼貽製錦誚經過緬遐躅神對宣幽抱言采江上
蘩薦此廟中貌誰謂殊千載可以同高調

經始浩歌亭

希世無妍姿守道有睽愆上書謝巖邑移署賁文園多
士日在門聖猷邈相宣夙心亦云已時好良不然再麾
宰畿甸驅役赴漳川昔感玄陰徂今睇朱明旋亭宇聚
崇構桃李紛廣阡偃息寡民務迂拙聊自便密邇被王
化幸與樂豐年河陽匪殊調單父庶茲絃

秋日詠懷

緬昔承嘉惠來斯歲方基虛薄宰民社周爰歷皇圻簿
牒苦相迫代理猶未綏幽亭有遐託晏坐俾心夷惟時

值蕭序孤英被芳畦
窓岫列紫峯
淦水夾綠池
陶生稱
達士王令乃仙姿
飛鳥謝當路
反服歸東菑

自中山別陳子良會之無極作

閉戶理案牘
尊酒日慙慙
出郊覽物色
桃李花繽紛
游子感行役
因君念離羣
況起嚶鳴鳥
悵然不可聞
回首
中山道
傷心隔暮雲

登挂劍臺

臺在張秋東有徐君墓
草似劍形能治心疾云

徐君美初覲季子意方敦
上國游纔返斯人痛不存
脫

紉帶嘉樹揮淚向高原舊手無由贈馳目遂為愆寸心
良自許千金寧足論徒聞化靈草憂來欲代萱

胥江汎月旋舸登城歸詠

江寒湛澄澈華月輝相鮮乘流載尊俎瀉影發樓船翠
巘合杳靄蘭皋帶長煙萬艘雜燈火千門紛管絃飛蓋
攬崇堞輟棹迴前川曾經故宮裏為照荒臺邊情非烏
棲夜跡是鹿游年登高與臨水行樂併悽然

黃州郡齋作

少年不知諱，攄衷懷。謬在宥，蒙至仁承。嘉譴猶薄員，
外置為理齋。中但掩閣輟藻事，刑書懸蒲代。敲朴株染
得自明，逮者盡釋縛。雖乏廣漢神，庶幾仲由諾。兩聞春
鳥鳴，再見秋英落。笑悟孺子歌，間從漁父謔。采蘭貽所
思，無媒將焉託。投賦弔湘纍，長揖返丘壑。

皇甫司勳集卷四

欽定四庫全書

皇甫司勳集卷五

明 皇甫汈 撰

五言古詩

春夜遊西園同諸兄弟作

佳節值瑤燈清夜遊金谷良友披蘭襟懿親儷芳躅經
過敞榭邊徙倚寒塘曲遵渚雖近尋翫峯生遐矚軒冕
幸暫違簿領謝羈束蹟非三逕荒情是一丘足鏡裏髮

始華尊中酒初綠及時不為歡坐遣春光促

奉答子安兄

江郭改故陰家園藹新霽柔條始發林芳草漸紆砌
潘居信為閒揚亭況重閉曰余忝明時與子承嘉惠分省
各有愆佐郡慙所莅暫就北山招轉愜東田稅情忘桃李
言迹豈匏瓜繫感遇興長謠來章緬幽契

春日遊西山作

吳鄉信云美山水饒嘉麗疊嶽表參差層巒隱虧蔽時

惟二月芳雨散千門霽蕙畹蕩雲滋蘭皋屏氛翳獨攜
丘中琴言鼓江上桤結友遵巖阿尋僧指林際仰看衆
鳥翔俛悅鯨魚逝物理相因依余蹤且留滯

夏日來鳳亭小集各賦

首夏猶芳月終宴就薰風泛觴蘭水上置座竹林中飛
花代舞似鳴鳥當歌同笑將愁暫破醉遣累俱空更待
西園景留賞北山叢

寄懷王道思三首

姁行每招愆榮名乃為累弱冠懷夙齡登廟成華器寧
知洛陽才祇取漢庭忌願因天際歸及此河干伺

忽散遊梁客來作過吳人朝發胥江汭夕濟蠡湖津還
山一何迅行路多苦辛臨水欲相送停雲庶可因

本乏希世姿翻為逢時誤良友豈不懷遠征詎遑顧日
暮勞所思凌風未成晤將從夢寐求緬邈山川路

陸士衡墓

平原秉秀質吳趨蔚清芬邁德自軒裔夙齡非世羣珪

璋既特達華萼復輝紛運謝金陵氣銘晞石室勲砥節
在繩祖奉義乃從軍寧知懷慷慨從茲嬰垢氛旗掩朝
歌月劒起夜臺雲李廣忌為將揚雄耻綴文鹿苑成單
露孤丘迷曠芸吁嗟千載鶴何處一來聞

晉書機始臨
戎而牙旗折

意甚惡之鹿
苑機敗軍處

秋夜把酒對月

宋生陳九辨陸機歌百年悵茲清秋日聊使幽懷宣矯
矯歸雲鴈嘒嘒含風蟬摧芳委朝露俄景流夕川鱗運

有代謝薜榮無常妍始知行樂貴何用居情牽長夜思
秉燭新月正登筵金尊泛綠醕寶瑟絃朱絃商歌當聚
下楚舞出花前餘名馬足藉達生乃為賢

仲秋之月諸弟燕私風月雖佳雲雨或間五首

奉義遊京邑數載違親宴迢迢明月光照我越江漢何
如故鄉夜及此清秋翫鏡彩攬未盈壁景委纔半桂樹
敷丹英華萼紛相煥雖謝西園棕庶附南枝翰

十三夜

良辰信具美清夜永為歡明月已幾望華彩流雲端廣

庭置芳座高會列盤餐但云杯行緩不惜露下寒情來

感今易蹟往戀昔難一聞關山曲猶似別長安

十四夜

敦賞每卜夜行樂聊及時秉燭且不寐待月豈云罷鱗

鱗玉葉薄皦皦金波遲高臺臨窈窕迴塘生漣漪載歌

蟋蟀唱復詠鵲鵲詩清輝一以鑒素心同所期

十五夜

嘉月有餘照歡娛無限情寵弟載肯酒要我坐華楹莫

齊英復委桂滿輪乍傾忽忽愁霖至瀏瀏悲風鳴圓缺

遞相運明晦焉足驚太康靖往訓知止崇令名

十六夜

肅肅斂朝雲娟娟收夕霧江上珠始來天際鏡方露列
宿齊掩縹凝霜共呈素嘉肴尚堪薦美酒猶足具良友
且無歸劇飲酬茲遇所願揚末光何辭照遲暮

十七夜

秋宵酬子安兄作

清夜遊家園眷言懷丘壑素月升圓靈千里共寥廓始
出東南樓俄頃西北郭華燭滅蘭堂金波蕩羅幕雖過
二八時光彩紛綽約商歌正流響魯酒亦未薄人生貴
適意胡為坐羈縛結髮從至今朱顏悵非昨冶服豈常

翫榮名焉足託良會聊具陳麗藻復間作穆如揚清風
粲若敷春萼申章忝惠連何以獻康樂

東吳吏部純叔

冉冉清秋末戚戚幽懷始借問所懷誰翩翩佳公子從
告返家園薄言戀桑梓豈乏晞世符緬契齊物旨嬰情
匪軒服委志在文史馳翰揚英芬敷藻爛成綺為道日
方損修能時見忌屢偃東郭扉果愜南山此酒德叅浮
萍琴心間流水迴飈謝囂塵何能渝令美

秋日往梅林莊居

疏公守舊業班生慕常廬薄遊千里外一出十載餘偶
與密親邇怒焉懷所居東林扉尚偃北郭逕始除青山
藹盈戶綠水湛通渠流盼恣成往眷言思遂初將從古
人學乞歸事耕畬顧驚年蹟乖坐使情興紆

奉答子安兄歲暮見貽

在昔叅英寮俱承明主顧被服紛妍姿影纓儷芳步悲
哉遊子情徒以潛郎故一為衝飈激遂使佳期誤入魏

悵無奇浮湘眷有慕揚旌指敝廬千里同歸路再聞蟋蟀唱兩見蒹葭露耀靈本易傾馳運豈難度端居懷苦心苦心誰與晤但感時不然何嗟歲云暮

冬日往虞山作

故鄉誰不懷名山矧余慕一為塵蹟牽遂濶賞心晤偶值芳歲闌遙泛滄洲趣澄江帶餘霞丹壑收殘霧嚴霜委野草寒飈振臯樹指迷尋舊蹤流盼成新寓魚樂媿淵沈鴻冥羨雲鷺歸來徒是今履往悵非素

贈范子

在昔紀高士遐哉舉逸民始知弓旌代迺有巖壑人范
子秉茲尚非病自云貧結廬靈山曲垂竿胥水濱緒年
習道論遊方狎隱淪披裘忽過夏采藥已載春雨漂庭
下夢風落甌中塵為頌幽貞吉庶宣皇化淳

皇甫司勳集卷五

欽定四庫全書

皇甫司勳集卷六

明 皇甫汈 撰

五言古詩

初發京口

少年慕攀鱗千里輕徒步
媿非登廟姿亦謬臨軒顧
朝躋赤墀塗夕騁青門路
寧知世網嬰遂為儒冠誤
昨浮湘江還願守箕山臥
不勝戰者勞心蹟兩乖忤
解纜指

廣陵春戀未能渡興歌矚流波庶幾照情素

贈黃子先皇甫氏也因避地隱姓云

范睢入秦庭梅福遊吳市隱姓干相君逃名類仙吏客
逢江夏生自謂西州裔叔運遭崩亂遠迹甘留滯家本
秦川人自從越鄉寄披霧清明朝利見飛龍位論難登
石渠烟煨吐經笥述德誕吾宗濟美光通世並載發江
都方舟涉淮泗聊宣敦賞情一慰羈離思

桃源遇風追子安兄舟不及

干祿非夙心行役苦相迫仗策隨平原揚舠共羈客空
水閱桃花深山眺桐栢終風暴且來奔湍溯方逆臨津
引不前天際孤帆隔馳情東望時何異西陵夕停橈既
無悰對酒亦未憚眷眷勞歌興戚戚煩憂積

張水部招登戊己山兼覽徐武功所撰河功碑

劉向莅都水張騫窮河源哲人播嘉績上善迴狂奔土
阜等蒨施延眺曠周爰魯連蕩遺軌蒙山隱華軒化因
子奇著信以季札敦武功吾鄉彥烈烈豐碑存辛勤宣

防事慷慨昏墊言之子守畫一何異雙璵璠往蹟隨清
泚興情寄綠尊

天界寺贈半峰上人

顧省紛俗嬰尋山愜幽趣秋水淨金河寒雲翳珠樹了
看花落時莫辨鳥還處休公別來詩江生擬將賦

雨過高座寺

積雨黥花丘緣雲入香界修策振林間疎鐘落峰外康
樂誦阿含陳思演清唄欲除常戀牽惟是逃虛快

奉謝王司馭惠方

與君闕下逢恍記壺中別高駕凌雲煙芳姿若冰雪狂
走衆方驚心醉自相悅安知問馬言獨守養鷄說金丹
何日成瑤章終歲掇倘承清燕餘無輕鴻寶訣

雪日寄王戶曹湖上官舍

初雪度江城殘雲來省閣覽物嗟歲殫懷人悵居索擇
木本同棲傾枝猶異託維舟安可從開樽自成的酌

同蔡中郎過王員外宅懷子安兄

委巷駐高車清溪夾幽宅細雨急逝年凝燈照寒夕依
同南樹情飛異西陵迹為假雲中翰一寄天台客

往視城南別業

夙齡不事產落魄懷英風抗志雲霄外絕戀蓬蒿中避
世豈在遠漢庭聊見容未識山川險安知途路窮兩自
違京輦久欲返臨邛疏公有遺業精舍開牆東命策值
蕭序覽物感情悰逕密多陳莽林荒非故叢昔往候門
稚今歸成塞翁鳴蜩若騰笑馴麕儼相從搏飛乏高翼

何為苦微躬吾廬倘可適稅駕幸來同

奉和子安春日軒中讀丹經之作

徵君抱沈療平子起憂端測化芳春日歎逝清河瀾同
心開寶帙託慕在金丹將從餐霞侶共舉乘雲翰寓言
不可究玄理何能殫探崖石髓祕采嶽玉芝殘朝嗟秬
用老暮笑且為歡綠尊命高酌朱絃被雅彈但遣物累
盡豈辭人益難顏齡勿謂促達生庶自寬

余棲病經年刀圭未效季弟示我以沙門之偈伯

兄廣我以大道之篇伏枕奉酬并用逐瘧云爾
本懷蒲柳姿兼落風塵甯顧影蛇屢驚看心猿靡定憂
生苦多戚好道晚彌甚浮淮喪其珠還藥未有鏡晨誦
披雙玄夕覽流三乘親敦友于各各惠嘉訊空詮寄
深藻妙理發高詠因君念處才無令伐真性

子約北歸對酒奉答

三載遊京輦一朝旋故疆豈不眷華省惻愴在帷堂未
習舟塗險安知軌路長宵征無淹泊晨發懷不遑辭燕

獻芳歲踰楚變青陽入門問家難奚止庭選荒置酒相
慰勞臨食增慨慷已謝子興樂徒緬孝標傷諒乏緩齡
藥胡取駐顏漿風河有至誠雲壑且高翔

四月仙誕日友人昆弟集我蕭齋琴酒間作有倡
斯和

桃核訪初辰蓬山竚靈跡命駕紛行游披帷猶屏息敦
余值二難結客枉三益雨館霑餘清雲軒坐生白丘琴
發雅彈鄰酒瀉芳液泠然御鯤響恍若驟鸞翼吾意眷

山水何事餌金石方達無生旨安知有生懌

端午邀過叟以視藥不至

天中紀令辰塵外遲嘉客將同嵇阮踪未枉求羊跡側
聞採三秀獨坐煉五石犬護青泥函蛾飛白雲室丹玄
豈易成髓凝何由食不如持美酒酣飲恣所適緬余遺
綵繒期君報金粒

送沈二仲文游浙中因寄田叔禾

昔與田叔別乃自漢東都英髦值嘉運睇翼荷天衢軒

纓無榮戀竹帛有良圖玄疲子雲草書削路生蒲撝旃
辭京輦紆駕領藩符響臻傾四座焱散各一隅冉冉流
歲月駢駢奉馳驅時違事已異蹟舛情復殊冶容嫉衆
女姱行嗤淺夫敬通方見抵仲翔亦被誣杜門著越絕
倚市歌吳趨願因晨風想共保朝露軀之子羨黃鵠西
飛訪白駒氣合雙神劍光儷兩明珠雄談秋水至藻思
春葩敷虹霓遲心賞山水焉足娛申緘緬契濶撫已媿

槍榆

秋日寺眺

西錫混緇流南冠類囚客
昨戾青陽徂今來素秋迫
炎序俄戒涼華滋互凋實
前因感六迷後果證三惑
欲消塵世牽聊晦空山蹟
夙夜緬畏行明朝露方白

盛二仲交示廣志賦因贈

江左本多奇盛生稱獨秀
連化有性靈棲玄謝塵垢
披帙十行俱擁衾萬言就
揖手青門東醉心在良覲
廣志擬雕蟲織書臻古籀
情同呼霓餘興是凌雲後
魏匪辨

壁安相邀出金奏

雨懷盛二時在清聽齋中

支齋營八關陶情緬三逕嗟我求羊徒悵此琴尊興室
通心獨遐城嚴蹟難并卮言誰與談籥理自相證細雨
忽戒寒輕霏坐生暝天風迴海潮秋聲送清聽

璇上人院菊

灼彼東籬花眷茲西土見青蓮同淨安金粟等明舊色
普象王供香堪鹿女薦何異休公枝一令鮑生羨榮悴

各有因開落互相禪我本解官人歸情胡能遣

鮑明遠集有休

上人贈菊云
玳枝兮金英

皇甫司勳集卷六

欽定四庫全書

皇甫司勳集卷七

明 皇甫汈 撰

五言古詩

補官澶州行經曲梁作

弱冠陟明廬腰章宰芳甸方齒蒞阿奇希聲治卑賤媿
乏操刀長懼遺製錦譴桐絃坐屢鳴桃花歷三見北闕
忝嘉招東省參羣彥牽世值衝飈徂年倏奔電驅駕邁

新邦褰帷經故縣悲哉丘隴非悵矣閭井變猶煩父老
迎爭識使君面德汝匪惠心式歌詎成抃

始至澶州作

自我謝郎曹謁來守吏局塌翼懷奮飛低眉就羈束驅
役遵旄丘興歌睇淇澳愧乏沂海謠何以佐明牧幸寡
宣城辭間可理尺牘升既等陵喬沉亦悟陂復芳草合
江程清猿竚旋轂衛水日東流因之鑒心曲

廣平郡觀蓮寄翁守舊南比部郎

留京白雲司原廟青山路眷此湖上芳期之省中顧俄
承畿輔麾遂抗邯鄲步遶郭帶澄溪朱華湛秋露燕寢
晝亦閒襦歌夜安作徒爾奉清香無由展良晤

移官越中初返家園奉答伯兄虞山見寄

薄遊逗京邑獨往眷長林始奉越鄉役因愜故山尋曠
茲二載別良晤展斯令誰謂百里間猶自邈徽音未結
丘中賞先枉池上吟睇燕悲稍戢懷荆慨以深花源迴
俗轍蘿逕斷塵簪且駐稽東駕雲扉期此心

役行至樵李值親故作

放舟窮越水息駕見吳山山近殊易即室遠竟難攀徒
以大夫守悵茲遊子顏密親載尊酒晤面語鄉關歎逝
歲不待恩存淚已潛春來芳草際魂去白雲間無勞猿獻誚
會見鴻飛還

于役吳鄉值伯兄下第來集

余來自越郡君至由燕京解裘洛塵積對酒鄉思生為
語北征事猶多西笑情紫塞方傳箭潢池復弄兵受釐

在宣室遣使出蓬瀛上書或不御投筆竟誰成防秋邊
騎入何日海波平年已非軒冕志豈眷綏纓願守箕顓
節還就河陽耕聞斯倚增歎從此欲遺榮

謁劉文成祠

璿璣既舛運寶鼎亦乖移海宇蕩無象誕聖鬱有期陽
九值傾否明兩邁重離俟清乃契渭顯允聿興姬探符
洞赤伏懷韜臥青溪居擬王佐匹起為帝者師羣策叅
多士獨算莫與偕禹志晚晞帛良謨日陳帷立談不解

褐肆伐竟承麾陳張井蛙器妄干神龍姿一舉已就殄
崇朝遂于夷摧漢若電掃卷吳類風馳功成奉身退書
上賜骸歸且棄人間世帝鄉寧久羈貪天自貽戚震主
或見疑伊人信大雅榮名安可追報享式嘉薦像寢示
崇規蹇劣淹末宦竦踊企前徽稽首曷容贊撫心投此
辭

郡齋作

雅志懷山棲復得理山郡蒼岫入南楹白雲帶西徑雖

事簿領勞時與煙霞并心曠眺已遐蹟沈尋亦近下車
芳載徂牽牒明兩迅仁靜樂有餘拙遲澹無競命藻酬
清暉濡毫媿靈運

得月亭

清溪一何湛源深白雲曲望舒忽東昇浮光漸西陸燕
趾匪舊存芳亭煥新築碎壁時復沈散金如可掬雖乏
謝監棕聊寄庾公矚誰謂曠音塵古來共幽獨

遊仙都同樊侍御

寡諍謝畫牘懷仙抗宸旌怪石儼壁立危峰類削成陽
火伏未息陰湖鑒以清下有干霄木上有承露莖漢武
建栢寢秦皇慕蓬瀛惜哉無靈氣安得遂沖昇軒后獨
不朽鼎寶垂鴻名柱史良地主邀我釣天行黃金九奏
發白玉雙童迎聊從避驄路一展攀髯情

養疴江寺招長公不至

理人媿無術攝已徒嬰患假息贊公舍披味醫王觀逃
虛行滅蹟執熱坐揮汗空桑豈常廬聊得慰懷安美酒

非上藥亦足寄情歡
鷺峰斂夕霄鷺湖迴清瀾
心將碧雲合目隨弦月殫
所期殊未至還寢獨長歎

二郎回溪詞

事載青田邑誌

謝公永嘉守在郡
宥無為敦賞值令弟華萼
每相攜躋險既山頓窮源
亦水嬉溪名沐鶴是人覩
游龍非駕言輟棹際並影
浣花時凌波餐秀色拾翠
逗芳儀援琴挑未就解佩
贈猶疑高唐侈宋玉洛浦
悵陳思抒章但唇動締心
空目馳來同湫風止去作
飄雲辭停聲三婦艷

嗣響二郎回

樂清登簫臺訪浴簫泉

仙蹤詎可攀荒臺尚堪訪簫弄清泉中
鳥振紫巖上波動若鸞沈雲飄似鳬往
浮筠本無垢托心在塵想花溪如有靈
應流蓋山響

從軍行二首寄贈楊用修

鴻運纂丕基龍飛起潛邸聖孝亶淵衷
徽猷邁前軌聚訟紛盈庭批鱗抗羣議
徒逞折角雄猶取越樽忌在宥

蒙至仁承嘉遠投裔稽首金馬門傷心碧鷄戍幕府雅
好賢研君掌書記三紀踰瓜期數口尚匏繫竭來秉憲
章欲往問奇字為賦從軍行聊展懷人思

思文際聖君稽首萃羣辟子雲侍承明胡為去荒域被
命事犀渠差勝下蠶室憤志酬八書榮名重三策丁年
子卿嗟皓首仲昇泣看鳶窮瘴煙放鷄定何日業既違
操觚勲還期裏革五月行渡瀘千里望巴國瀘水向東
流巴雲忽西匿相思持寸心願附雙飛翼

滇省述懷

承嘉理齊安幸校長沙近秉憲按滇中始覺在遐境譙
相反見嗔揖侯乃成譽喻夷辭豈繁威燮法當峻昆明
爲作池太華鷄爲鎮遲夜召賈生經年淹許靖霞難駐
令顏霜易改衰鬢故人滿清班誰其枉芳訊龍性未可
馴鳳翼胡由奮聊從達士觀無嗟小人愠

皇甫司勳集卷七

欽定四庫全書

皇甫司勳集卷八

明 皇甫汈 撰

五言古詩

還山詩四首

少值時運昌因遭世網誤銓宰乏明藻官邪以彰賂申
椒詎見芳蛾眉秣成妬高揖聊遂初幽貞履吾素信天
方吠人跼鳶復遭路破甑苟不完奚取孟生顧虛舟自

相觸安得蒙莊怒歸休眷長林途窮日云暮

炫服耻遊越朱紘謬入齊木彊闕文理君房特妙辭一
丁且未解子雲翻好竒登乘多擁腫徒以先容質列肆
爭售礪抱璞或致疑蘇糞充華綃芳蘭委幽畦鉛刀俾
操割安用鏤邪為駿足泛清駕寧肯受羈羈願為鴻鵠
舉寥天戾羽儀

竭予歸頗怡室人交不喜童子前致辭主人何為爾昔
聞車馬喧盈門結如綺今來雀可羅蓬蒿但荒里朱幡

引鄙夫金章紫誰子百卉榮悴遷四運代成紀太宰填
園扉中丞棄東市義旨示凶終道家明殆止傖奴慎勿
言嗟哉吾已矣

饗富易決性縻爵豈知身舉國將嚇烏矜位乃驕人清
廟懼為犧綠波思縱鱗陳王蔚文藻憂生慕仙真江淹
摹別狀遨遊窮八垠哲士希昭曠愚者溘埃塵恩往若遺
藁寵來類積薪請從不材壽長守非病貧

悼亡友周詩二首

昔我求友生周郎早投分藻掇攄玄思雄談發孤憤壁
立常晏如崖檢若乖性落魄懷英風晤言每祛吝歲中
從薄遊時復惠芳訊謝秩始歸田延益擬開逕詎意雲
靡依忽隨露先盡登座揮素琴巡簷度哀磬遺令視約
終裂書寄遐殯

陶令棄官日微君寢瘵時巨卿宵夢愕元伯晨計馳申
緘五情塞撫膺雙涕垂既捐韓康肆復捲嚴平惟冥數
豈無驗良藥寧自醫夙昔重季諾感激平原知雖乏儋

石蓄能薄千金施游魂眷仲里託體虞山隈死生交已
謝留恨翟門題

聞郡檄至簡子約

同時叅外庭一朝謝朝列鍛羽非難馴所驚峻網設逸
足睇高驤聊以就羈紲予季廟廊姿為邦茂時哲及朞
宣令猷何暮佇來轍承檄懼有愆趨裝悵無悅曾是東
山情薄茲西河烈芳歲若電馳隆休亦颺瞥翹首關路
長寸心念將別

送陸宜甫歸洞庭

烈士睇康衢逸人緬幽壑矯翼鮮寧棲潛鱗有深託陸
君箕穎流雅志甘場藿被褐自行吟持經事耕作別來
歲屢邁念往迹猶邈避亂辭東山韜光翳南郭聿暮促
歸心申章敘離索雪積湖上居雲停林間閣挂席迴青
陽援琴遲芳酌願保黃髮期無渝素心諾

秋夜偶作

晚歲絕外牽懼悰寄所適皓齒發新聲蛾眉矜故色變

態逐情生羽商隨意易冶艷詎有央靡曼信無極歌方
一再聽行期三五夕淫雨忽東來素輝乍西匿金尊悵
屢空玉趾邈難即露砌寒蛩鳴風窻起嘆息

送兒北征四首

竭余解宦日及爾承歡時開室茂林下灌園清溪湄豈
不眷明發胡為遠別離別離情所難況乃去庭闈榮名
會須早玉體愛無虧夙奉垂堂誼聊以贈臨岐

岐路邈山川行行感疇昔束髮升華階策足踐文石多

金史四庫全書
卷八
士叅嘉招入朝懷盛飾思作凌霄翰忽為衝飈激從事
踰三紀歸來徒四壁逢人惠問稀無嗟不相悉

少乏理人術辭邑願遺榮仰荷王明眷移署廁儒英崇
文闕東序延宵昉西京禮樂千載會冠蓋四門并鴻都
掌故在鳳闕觀新成惟有青絀業庶可紹家聲

家慶辭南陔江程引西渡稍聞長淮流遙見廣陵樹從
親三八都皆子舊諳路抗志慕遠遊焉得勞內顧別筵
謝蘭芳歸舟理金素曾是桑榆年牽情日云暮

謁伍相祠

按志城西南三十里胥山上有胥王廟漢以來
咸秩祀宋元嘉中始徙城內後屢新之廟貌猶
冕服九章襲王封之舊云

志士謝明哲胥君懷謇忠覆郢既云烈強吳亦稱雄
逞怨匪報德交亂豈圖功貫矢麾使却脫劍閔途窮鞭平
良已酷陷詬竟奚恫載革浮江上扶目窺城東踟躕顧
玄寢惻愴歷朱宮冠旒緬生貌服袞乖吾衷一聞歌小

海流思託回風

題歙蘇氏四賢樓

四賢者何漢關內侯武唐許國公頤宋叅知政
事易簡歙州守壽也武以烈節顯壽以循良稱
頤與易簡並擅文苑咸宜秩祀胡久忽諸茲幾
世孫明太學生蘇若川追念爾祖建樓以妥靈
卜地於弘曠為樓壯麗勝甲歙中嘗遊於余門
請題以識若蘇生者可謂昭德揚芬而四賢者

亦可以不死矣

倬彼司寇裔誕自昆吾封桓桓起代郡奕奕遷武功子
卿奉漢使亮節匈奴中龍庭歸皓首麟閣展芳容許公
際時昌遂為唐主佐摛藻埒張燕陳謨贊機務皇宋舉
叅知承明奏辭賦厥脣守歙州斯民覃慈慕曾是懷土
思何如眷仁里歛既蒙守恩蘇乃家於此述德發幽潛
登裡昭令美拓地構崇基飛甍列疏綺綺樓一何峻迴
接巖雲浮玉几挹羣岫蘿軒俯雙流佳氣霽日夕靈貺

惠春秋子孫引勿替復始宜公侯

玉几
山名

臘月十五翫月荅子約

圓景攬兔升馳光感駒隙西園將密親南樓遲嘉客生
無百年期能幾三五夕旨酒盈樽壘高堂間琴瑟請誦
唐風詩胡為坐拘迫棣華眷季方攜藻凌希逸往晤迹
易陳來悰會難逆再滿清夜輝寧知芳歲隔

夏至病遣

倏感青陽徂俄值朱明居有渰散朝霖輕寒凝暮靄如

何芳菲日猶是淒其態情闌花鳥餘興遶雲林外未悟
衛生因徒寢謝家瘵搔首倦簪裹循腰緩衣帶風河易
招損塵網難祛礙玄思誰與宣勞歌示茲慨

酬劉侍御見訊

李生嗟大雅魏主惜通才王風邈已矣斯人安在哉劉
郎挺國秀束髮晞天階影纓隱柱下攬轡歷南臺矯行
末俗詆恩寵中道乖游梁倦棲翼入洛傷羈懷遂解東
都綬聊翦北山萊却掃百慮捐流覽羣言該縱盼躡霞

金匱要略卷八
聲抗跡凌囂埃春往童冠集夜坐樽罍開趙瑟既以越
秦第一何哀棣華慙二俊藻詠蒙雙栽世苦隆暑煩惠
然清風來比聲麗金艘炫目皆瓊瑰申章詎成報抽思
屢遲迴幸值賞心晤無使榮名墮

題王元美離資園

傲吏緬開徑隱侯始卜郊翔圃從藝術抱甕至終朝荷
鍾帶絀帙流觀詠楚騷克庭緝蕭艾偃戶翳蓬蒿
一何穢母俾溷申椒艾蘊不及根滋蔓將盈條弱齡砥

誇行束髮就嘉招，紉佩躋蘭省袷服。
立熙朝，君子節彌亮。小人道自消，塞芳命良友。
抒藻振長謠。

答盧式

王風寢失古，頽波蕩自今。李生陳大雅，劉子抱文心。
弱余振鴻藻，高義抗詞林。歸田守玄默，閉關謝沉吟。
江左鬱華彦，歲暮得盧諶。騷騷思長奮，良樂此相尋。
申章粲如玉，感贈重兼金。徒然奉清奏，何由酬賞音。

張仲讀書吳山

輟養辭南陔駕言邁西郭問子將何之避喧謝羈縛堂
間豈不懷雲林諒有託風叩支闕清月鑒董帷薄披帙
就長明靜夜靈花落羊亡屏意筌猿定啟心籥幽谷聞
鳥鳴澄湖眺魚樂霞綺雜煙絲桃柳互紛灼時在塘上
篇日積丘中作焉得奮羽翰因君適寥廓

高樓一何峻贈劉侍御

高樓一何峻迢迢峻而都百尺懸飛陞八憲列交疏璇
題像刻鳳遊極類翔鳥信茲蓬萊境曠哉仙人居風齡

茂文藻委志諷詩書臺端既肅軌河內亦承符解纓謝
神武稅駕凌清虛炎曦戒末垂涼飈被廣除徵聲理絲
竹張燕集簪裾嘉賓傾四座豐膳出中厨靈妃遞楚舞
雙童揚吳歆容成獻瓊醴長房啟玉壺一飲粲顏色再
飲葆令軀願言享黃髮榮名千載俱

寄題宗室芙蓉園

忘憂楊柳館逍遙芙蓉園粲粲朱華冒田田綠葉繁日
涉宛成趣竭來殊避喧心將隱淪逸蹟謝帝子尊璫琴

既以御綰帙亦間翻采賦等梁孝敦詩從楚元美人隔
千里幽芳誰為寥輕舟越江渚欲往執孤駕無媒焉所
託有懷何由宣申章聊代訊寤歌在弗諼

皇甫司勳集卷八